

**Penentu kejayaan transformasi Malaysia - Nor Mohamed
Utusan Online
September 29, 2011**

KUALA LUMPUR 28 Sept. - Peningkatan kecekapan dan produktiviti akan menjadi penentu utama kepada kejayaan transformasi ekonomi dalam menjadikan Malaysia sebagai sebuah negara berpendapatan tetap.

Menteri di Jabatan Perdana Menteri, Tan Sri Nor Mohamed Yakcop berkata, perubahan transformasi dalam produktiviti perlu dicapai melalui peningkatan peluang dalam kecekapan, kreativiti dan inovasi.

Menurut beliau, untuk menjadikan produktiviti sebagai pemacu utama pertumbuhan, Malaysia amat perlukan bakat-bakat berkemahiran tinggi, berkaliber, komited dan motivasi tinggi untuk menerajui perubahan tersebut.

"Masa depan ekonomi Malaysia bergantung kepada transisi untuk menjadi negara maju pada tahun 2020.

"Untuk mencapai status itu, Malaysia telah melaksanakan Model Baru Ekonomi, Rancangan Malaysia ke-10 (RMK-10), Program Transformasi Kerajaan (GTP) dan Program Transformasi Ekonomi (ETP).

"Semua pembaharuan ini telah dibentuk untuk menjadikan ia sebagai hala tuju yang holistik sebagai formula untuk menjadi negara berpendapatan tinggi," katanya ketika berucap dalam majlis makan malam Dewan Perniagaan Melayu Kuala Lumpur di sini hari ini.

Nor Mohamed menambah, selain bakat, aspek lain yang penting adalah peranan swasta sebagai enjin pertumbuhan negara, selari dengan pelaksanaan ETP yang mendorong pembabitan swasta dan kerajaan hanya sebagai fasilitator.

Dalam membantu swasta sebagai peneraju ekonomi, kerajaan telah memperkenalkan konsep Dana Kemudahan dalam RMK-10 dengan peruntukan sebanyak RM20 bilion, katanya.

Menurut beliau, dana itu merupakan mekanisme insentif yang menyediakan sokongan kepada pelaburan swasta.

"Kita menjangkakan dana ini mampu menjana lebih RM200 bilion bagi pelaburan swasta apabila ia digunakan sepenuhnya," ujar beliau.

Bagaimanapun, beliau berkata, dalam menuju transformasi itu, keadilan sosial juga perlu dipastikan.

Jelasnya, keterangkuman dan keperluan untuk mengurangkan ketidaksamaan adalah kritikal untuk perpaduan sosial.

"Sebab itu, dalam RMK-10, kita menyasarkan untuk meningkatkan taraf kehidupan 40 peratus isi rumah melalui pendapatan dan program pembinaan kapasiti, jaringan keselamatan sosial dan menangani keperluan kumpulan berpendapatan rendah," katanya.

Selain itu, kita menubuhkan Teraju yang akan menjadi peneraju, menjadi koordinasi dan memacu agenda Bumiputera dalam pelan transformasi negara

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=0929&pub=Utusan_Malaysia&sec=Ekonomi&pg=ek_01.htm